

金匱要略直解

周禮史官樂官與醫卜之官
皆世掌之業故醫不世不良
歟槐塘程氏爲新安巨族代

有達者松厓敬通以儒精鴻
術所刻王燾外臺秘要四十
卷壽世已久乃今以雲來特
冒雲來專雅大需魚弋藝林

原缺

景書俱靈符寶錄其讐較未
梓有宋徽宗聖濟總錄二百
卷元大德年間耶律楚材重
刊今宇內無副本恨不立登

梨棗以公天下顧繕刻未易
余茲敢辭弁言乎或難之曰
昔許嗣宗善醫人勸其著書
荅曰醫者意也思慮精則得

之仁莫能宜虛著方劑亦趙
括之讀父書也余曰不然醫
之有方猶匠氏之有規矩車
之有轍跡漁獵之有筌蹄也

神明之則悟在斲輪矣昔郭
浩翁著針經診脉法授弟子
程高玄晏先生以著述爲務
習覽經方手不停註陶隱居

性好內外經撰神農本草八
卷太清草木方三卷補肘後
救卒方六卷王冰得先師所
藏太素大爲詮次註素問合

八十一篇二十四卷歷二十年
乃成此數先生皆以經方
作濟渡雲來今亦以經方濟
渡生民隱居涪翁共欣再見

倘有同心君子贊厥成功令
聖濟總錄刊布國門豈徒壽
民可以壽國矣是又余之厚
望也夫

康熙癸丑清和月中州年家
弟李錦頓首題於寶婺之

正和堂

序

上古之人生而神聖妙達
醫理故能裨贊天地迎毓
太和使溥海內外無夭札
淫慝之患降及周室首以

燮理陰陽寄之三公大小百
執事程績課能莫不民命
是重瘍醫酉食醫酉使冢宰領
之不與他藝齒漢治近古陽
慶淳于意之屬煩天子下

書采問其術雖不盡傳略
見於史者彷彿可誦至仲景
氏大備矣世獨稱能傷寒
乃金匱一書於雜病無不載
其指奧博讀之者罕越千

五六百季程君雲來始以解
著嗟夫古書錯簡多矣一
字之訛存亡呼吸所係病有
似是實非者執方有宜古不
宜今者藥有耳目未經見者

不縷析之又從糾正之則書
有時而窒故醫病不一方猶
醫國不一法起仲景於今日
將必有審機察運轉摺變
化不窮者直解所繇通其

隱而作也辛亥三月余始
識雲來於林觀察鐵厓坐
上鐵厓好異所納交多畸人
意雲來附詭不羈裂塵網
以立名譽者旣而暱就余

溫然長者徐出是編讀之
終卷此非訛謔言也其有憂
憫之心者耶自兵刑水旱之
氣被於生民使民多疾其
疾為繁苛為促急志慮伊

鬱手足拘蹇而不得舒誠
望良有司在上體

國家愛恤民命之意弛禁播
澤以全活之庶幾治之既病
之餘以收旦夕之効乃下之

望有司者。如有司徒置
民之疾而莫之省而能活之
者不數。見是其責不得不
轉而之醫師也。今之醫不皆
為吏不及古之盛而儒者有

志於學往々肄之如雲來
者以黃山甲族累世通顯好
臨安山水僑居其間逍遙
自肆日抱遺書守成法挾
摘義例以教天下後世之業

是者隨所遇而盡心焉以
勸治道所不及功不既偉
矣乎鐵厓不復作誰為聞我
言而致愜也

康熙癸丑長至後三日

檇李曹溶撰

分。後人岐而成雜。故該之以要。者繁之對
辭也。誠能總其機宜。通其款綦。則舉要可以
竟繁。類中自有不類之法在。從此而合離變
化。應用無方。此之謂畧。畧猶韜畧之畧。門類
雖分。握奇制勝在法。不啻醫門中之有鈐書
也。其中秘奧。盡從內經中節宣之。而成條成
理。在後人深思而始得之。故總而名之以金

匱要畧。後人不達前賢立言之旨。而又不肯
安於寡陋。妄謂要畧實傷寒論中分出。并竄
去要畧字。而易之以金匱玉函經。玉配金函
配匱四字中自爲對類體。仲景當不若此之
蒙。至于經之一字。仲景固不若此之僭。或以
爲後人從而尊之之辭。夫去其并書之本名
而尊以易之。則自古迄今。所宗尚者莫如孔

子。曷不尊學庸論語而易之曰大學經。中庸
經。論語經耶。甚矣。世人不能于名書處。尋出
古人門戶。只此開口。便爾胡亂。欲求仲景尚
有傳書。胡可得也。故余于傷寒論。已有註矣。
今更得雲來註及金匱要畧。以補余書之所
未逮。而且匡救其缺失。蓋余書有放浪縱肆
處。而雲來則惜墨如金。余書有恢諧俚謔處。

而雲來則酌言成雅。余書有離奇躍冶。不踐迹處。而雲來則廻環曲折。處處圓中規而方中矩。意者余書在翻駁前人。勢不得不如此。彼雲來在承啓後學。勢不得不如此耶。余讀其書。寬緩中自是緊嚴。密緻中自是開闊。仲景有此階梯。金匱要畧方可適用。不致設論有餘。療病不足。正朱子所謂如遊阿房之宮。千

門萬戶。隨其所入。如達大道之衢。珍奇菽帛。隨其所取之書也。此則舉世之楷模。又豈止余一人之藥石已者。獨是以直解名書。與余之後條辨。頗無異同。豈于典淺顯三字。余肯或有契于雲來歟。余固糠粃在前。倘得雲來鞭策之。使人謂南陽之傳書。尚有新安二程子一家言。則余年雖邁。敢不負弩矢。執鞭弭。

力追才高識妙之雲來。返揚其後塵。而步亦步。以通三才而爲儒。趨亦趨。以通三才而爲醫哉。

元譚公五十二世裔草市應旄頓首書

金匱玉函要畧方論序

張仲景爲傷寒雜病論。合十六卷。今世但傳傷寒論十卷。雜病未見其書。或於諸家方中載其一二矣。翰林學士王洙。在館閣日。於蠹簡中。得仲景金匱玉函要畧方三卷。上則辯傷寒。中則論雜病。下則載其方。并療婦人。乃錄而傳之士流。才數家耳。嘗以對方證對者。施之於人。其效若神。然而或有證而無方。或有方而無證。救疾治病。其有未備。國家詔儒臣校正。

醫書。臣奇先校定傷寒論。次校定金匱玉函經。今又

校成此書。仍以逐方次於證候之下。使倉卒之際。便

於檢用也。又採散在諸家之方。附於逐篇之末。以廣

其法。即瘧病壯蠟湯中以其傷寒文多節畧。故斷自

離病以下。終於飲食禁忌。凡二十五篇。除重複合二

百六十二方。仲景只二百二十九方。餘俱附方。勒成上中下三卷。依

舊名曰金匱方論。臣奇嘗讀魏志華佗傳云。出書一

卷曰。此書可以活人。每觀華佗凡所療病。多尚奇怪。

不合聖人之經。

臣奇

謂活人者必仲景之書也大哉

炎農聖法屬我盛旦恭惟

主上不承大統撫育元元頒行方書拯濟疾苦使和

氣盈溢而萬物莫不盡和矣。太子右贊善大夫

臣

高保衡

尚書都官員外郎

臣

孫奇

尚書司封郎

中允秘閣校理

臣

林億等傳上

明應天徐鎔謹按文獻通考二百二十二卷中

金匱玉函經八卷條下晁氏曰漢張仲景撰晉

王叔和集。設荅問雜病形證脉理。參以療治之方。仁宗朝王洙得於館中。用之甚效。合二百六十二方。據此并前林序云。依舊名曰金匱方論。則王洙館中所得。名曰金匱玉函要畧方。係五代時改名耳。所以通考只云金匱玉函經也。是金匱玉函經。元時已無矣。夫金匱玉函經八卷。東漢張仲景祖書名也。金匱方論三卷。傷寒論十卷。似西晉王叔和選集撰次。後俗傳書名也。

若金匱玉函要畧方。五代及宋相沿書名也。今單名金匱要畧。而去其玉函二字。愈遠而愈失其真矣。又據晉皇甫謐甲乙云。仲景論廣伊尹湯液。用之多驗。王叔和撰次仲景選論甚精。指事施用。卽今俗所分傷寒論金匱要畧是也。華佗指張長沙傷寒論爲活人書。昔人又以金匱玉函名之。其重於世如此。然其言雅。非精於經絡。不能曉會。是宋時纔分傷寒論金匱要畧爲

二書也。成無已明理論云。自古諸方。歷歲浸遠。難可考評。惟仲景方爲衆方之祖。是以仲景本伊尹之法。伊尹本神農之經。醫帙之中。特爲樞要。參今法古。不越毫末。乃大聖之所作也。只因無已七十八歲撰成名理論。八十歲註完傷寒論。未暇註金匱要畧。所以俗醫分爲二門。致今衆口一辭。謂仲景能治傷寒。不能療雜病也。冤哉。萬曆戊戌孟夏。市隱逸人識。

金匱要畧直解

凡例

一仲景自云。勤求古訓。博采衆方。撰用素問九卷。八十一難陰陽大論。胎臚藥錄。并平脉辨證。爲傷寒雜病論各十卷。考之經籍志。內府所藏者。金匱玉函八卷。脉經一卷。方十五卷。評病要方一卷。五藏論。口齒論一卷。療婦人方二卷。今所見者。傷寒論十卷。金匱要畧三卷也。

一是書明初有趙以德註。嗣後有胡引年註。方論訛舛甚多。今竄求善本改正。其闕文疑義者。存之以待來學。

一引證諸書。悉本靈素。本草。脈難。甲乙。中藏。及傷寒論。其六朝唐宋諸名家。有確論者。亦附之。林也後學。以經證經。要在直截簡切。義理詳明。期於取用。不故作僻語。迂論曲解。以期誤人也。

一斯道之妙。洞徹氣化之機。精貫陰陽之理。非參究

之士。語之不知。非達道之人。傳之莫習。故讀仲景金匱。必融會仲景傷寒。澄心年月。便領悟其旨趣。否則得此失彼。未許窺其要妙也。

一仲景方法。如麻黃湯。先煮麻黃者。大承氣後內芒硝者。大小柴胡復煎者。有頓服。溫服。小冷服。日三服。日三夜一服。日再服。其助藥力。有啜粥。有飲暖水。有食糜者。有重覆取汗。取微似有汗。取下。取利小便者。如此之類。未可一二詳載。方法圓通。千古

不能踰越。故謂之祖方焉。

一家藏傷寒書。自郭白雲龐安常成無已後。約五十餘家。行將剗剗傷寒集註。公諸宇內。

一宋林億校正附唐人諸方。如侯氏黑散之類。今皆剗去。其柴胡引子。則宋人方也。

金匱要略直解 凡例終

金匱要畧直解目錄

卷上

藏府經絡先後第一

疸濕弱第二

栝樓桂枝湯

葛根湯

麻黃加米湯

麻黃杏仁薏苡甘草湯

防已黃耆湯

桂枝附子湯

白朮附子湯

甘草附子湯

白虎人參湯

一物瓜蒂湯

百合狐惑陰陽毒第三

百合知母湯

滑石代赭湯

百合鷄子湯

百合地黃湯

百合洗方

栝樓牡蠣散

百合滑石散

甘草瀉心湯

苦參湯

雄黃薰方

赤小豆當歸散

升麻鱉甲湯

附麗安常葛根龍膽湯

附子飲

瘡病第四

鱉甲煎丸

白虎加桂枝湯

蜀漆散

中風歷節第五

桂枝芍藥知母湯

烏頭湯

血痺虛勞第六

黃耆桂枝五物湯 桂枝加龍骨牡蠣湯

小建中湯 黃耆建中湯

薯蕷丸 酸棗湯

大黃廐蟲丸

卷中

肺痿肺癰欬嗽上氣第七

甘草乾薑湯 射干麻黃湯

皂莢丸 厚朴麻黃湯

澤漆湯

麥門冬湯

葶蘆大棗瀉肺湯

桔梗湯

越婢加半夏湯

小青龍加石膏湯

奔豚湯第八

奔豚湯

桂枝加桂湯

茯苓桂枝甘草大棗湯

胸痺心痛短氣第九

枳實薤白白酒湯

枳實薤白半夏湯

枳實薤白桂枝湯 人參湯

茯苓杏仁甘草湯 橘皮枳實生薑湯

薏苡附子散 桂枝生薑枳實湯

赤石脂丸 九痛丸 非仲景方

腹滿寒疝宿食第十

厚朴七物湯 附子粳米湯

厚朴三物湯 大柴胡湯

大承氣湯 大建中湯

大黃附子湯

赤丸

烏頭煎

當歸生薑羊肉湯

烏頭桂枝湯

瓜蒂散

五藏風寒積聚第十一

麻子仁丸

甘草乾薑茯苓白朮湯

痰飲欬嗽第十二

茯苓桂枝白朮甘草湯

甘遂半夏湯

十棗湯

大青龍湯

小青龍湯

木防已湯

木防已加茯苓芒硝湯

澤瀉湯

厚朴大黃湯

小半夏湯

防已椒目葶藶大黃丸

小半夏加茯苓湯

五苓散

茯苓桂枝五味甘草湯

茯苓五味去桂加乾薑細辛湯

苓桂五味甘草湯去甘草去桂加乾薑細辛

半夏湯

苓甘五味加薑辛半夏杏仁湯

苓甘五味加薑辛半杏大黃湯

消渴小便利淋第十三

文蛤散

栝樓瞿麥丸

蒲灰散

滑石白魚散

茯苓戎鹽湯

猪苓散

水氣病第十四

越婢湯

防已茯苓湯

甘草麻黃湯

麻黃附子湯

杏子湯

黃耆芍藥桂枝苦酒湯

桂枝加黃耆湯

桂枝去芍藥加麻黃細辛附子湯

枳朮湯

黃疸病第十五

茵陳蒿湯

消石礬石散

梔子大黃湯

猪膏髮煎

茵陳五苓散

大黃硝石湯

驚悸吐衄下血胸滿瘀血第十六

桂枝去芍藥加蜀漆牡蠣龍骨救逆湯

半夏麻黃丸

栝葉湯

黃土湯

瀉心湯

下卷

嘔吐噦下利第十七

茱萸湯

半夏瀉心湯

黃芩加半夏生薑湯

猪苓湯

四逆湯

小柴胡湯

大半夏湯

大黃甘草湯

茯苓澤瀉湯

文蛤散

半夏乾薑散

生薑半夏湯

橘皮湯

橘皮竹茹湯

桂枝湯

小承氣湯

桃花湯

白頭翁湯

梔子豉湯

通脉四逆湯

紫參湯

訶梨勒散

瘡癰腸癰浸淫第十八

薏苡附子敗醬散
大黃牡丹湯

王不留行散

跌蹙手指臂腫轉筋陰狐疝鼠蟪第十九

梨蘆甘草湯

鷄屎白散

蜘蛛散

甘草粉蜜湯

烏梅丸

婦人妊娠第二十

附子湯

桂枝茯苓湯

膠艾湯

當歸芍藥散

乾薑人參半夏丸

當歸貝母苦參丸

葵子茯苓散

當歸散

白朮散

婦人產後病第二十二

枳實芍藥散

下瘀血湯

竹葉湯

陽旦湯

竹皮大丸

白頭翁加甘草阿膠湯

婦人雜病第二十三

半夏厚朴湯

甘草小麥大棗湯

溫經湯

土瓜根散

旋覆花湯

膠薑湯

大黃甘遂湯

抵當湯

礬石丸

紅藍花酒

腎氣丸

蛇床子散

狼牙湯

小兒疳蝕齒方

雜療方第二十三

長服訶梨勒丸

三物備急丸

紫石寒食散

救卒死方

共五方

救卒死而吐熱方 救卒死而目閉者方

救卒死而張口反折者方

救卒死而四肢不收失便者方

救小兒卒死而吐利不知是何病方

治尸厥 共二方

救卒死客忤二方

救自縊死方

療中暍方

救溺死方

馬墜及一切筋骨損方

禽獸蟲魚禁忌第二十四

論辯二首

合九十法

方二十首

菓實菜穀禁忌第二十五

方十四首

雜禁七十五條

金匱要畧直解

目錄終

金匱要畧直解

上卷

南陽張

機仲景述

新安程

林雲來註

中州吳

璟又平較

藏府經絡先後病脉證第一

問曰。上工治未病。何也。師曰。夫治未病者。見肝之病。知肝傳脾。當先實脾。四季脾土不受邪。卽勿補之。中工不曉相傳。見肝之病。不解實脾。惟治肝也。夫肝之病。補用酸。助用焦苦。益用甘味之藥調之。酸入肝。焦

苦入心。甘入脾。脾能傷腎。腎氣微弱。則水不行。水不行。則心火氣盛。心火氣盛。則傷肺。肺被傷。則金氣不行。金氣不行。則肝氣盛。肝氣盛。則肝自愈。此治肝補脾之要妙也。肝虛則用此法。實則不在用之。經曰。虛虛實實。補不足。損有餘。是其義也。餘藏準此。

孫子曰。水之性。避高而就下。兵之機。避實而擊虛。工之用藥。亦猶將之用兵。醫之與將。異事同能。不可不察也。是以上工治未病者。以其易爲力也。靈

樞經曰。無迎逢逢之氣。無擊堂堂之陣。故不治已病者。非故舍之也。避其銳也。陰陽應象論曰。因其輕而揚之。因其重而減之。因其衰而彰之。所謂因者。乘其機也。治未病者。謂治未病之藏府。非治未病之人也。夫五味入胃。各歸其所喜。酸先入肝。苦先入心。甘先入脾。辛先入肺。鹹先入腎。是見肝之病。當先用甘實脾。使土旺則能勝水。水不行。則火盛而制金。金不能平木。肝病自愈矣。此治肝補脾。

治未病之法也。愚謂見肝補脾則可。若謂補脾則傷腎。腎可傷乎。火盛則傷肺。肺可傷乎。然則肝病雖愈。又當準此法以治肺治腎。五藏似無寧日也。傷字當作制字看。制之則五藏和平。而諸病不作矣。

李瀕湖曰。酸苦甘辛鹹。一定而不變者。五味也。其或補或瀉。則因五藏四時而迭相施用也。寒熱溫涼。一定而不變者。四氣也。其於五藏補瀉。亦迭相

施用也。仲景以酸補肝。而素問又以酸瀉肝。此以焦苦補心。而吐衄又以三黃瀉心。圓機者。可迭相施用。非瀕湖不能語此也。

夫人稟五常。因風氣而生長。風氣雖能生萬物。亦能害萬物。如水能浮舟。亦能覆舟。若五藏元真通暢。人卽安和。客氣邪風中人。多死。千般疾難。不越三條。一者經絡受邪入藏府。爲內所因也。二者四肢九竅血脈相傳壅塞不通。爲皮膚所中也。三者房室金刃蟲

獸所傷。以此詳之。病由都盡。若人能養慎。不令邪風
干忤經絡。適中經絡。未流傳府藏。卽醫治之。四肢才
覺重滯。卽導引吐納。鍼灸膏摩。勿令九竅閉塞。更能
無犯王法。禽獸災傷。房室勿令竭乏。服食節其冷熱。
苦辛酸甘。不遣形體有衰。病則無由入其腠理。腠者。
是三焦通會元真之處。爲血氣所注。理者。是皮膚藏
府之文理也。

五常。謂仁義禮智信。以肝之德爲仁。肺之德爲義。

心之德爲禮。腎之德爲智。脾之德爲信。五藏脩而五德并。亦必因風而生長。靈樞經曰。風從其所居之鄉來爲實風。主長養萬物。律書云。條風居東北。主出萬物。是因風而生也。靈樞經曰。風從其衝後來者爲虛風。主殺主害。是因風而害也。謹候虛風而避之。故聖人避風如避矢石焉。王子亨曰。舟行於水。人處於風。水能泛舟而亦能覆舟。風能養體而亦能害體。蓋謂船漏水入體。漏風傷其理一也。

千般疾難。不外三因。詳之三因。病由都盡。故虛邪賊風。避之有時。不致干忤經絡。若適中經絡。不時卽治。勿隱忍。冀差以成痼疾。卽按蹻導引。吐故納新。鍼灸以通其穴。腧膏摩以澤其肌膚。王法不干。蟲獸無忤。更飲食有節。起居有常。病則無由入矣。腠理。一作腠理。三焦出入以溫肌肉。元真之所湊會。血氣之所灌滲也。理者。有粗理。有小理。有密理。有分理。有肉理。此皮膚之理也。府之環廻周疊藏。

之厚薄結直。此藏府之理也。

風氣能生萬物。亦能害萬物論。盈天地之間氣也。氣之濁者下降而爲水。氣之清者動盪而爲風。是風也。卽氣也。當其和煦之時。發育羣品。及其震烈之際。摧殞萬形。故春夏之風多生長。秋冬之風能肅殺。風主之也。天地間萬物。無非稟五行。五行稟風以生。亦稟風以殺。以其生者言。木得風則遂。其條達之情。火得風則遂。其上炎之性。是木火不

可無風也。五金之鑛。生於地則質柔。見風則剛。五金之器。藏於地則質軟。得風則硬。是金不得風。不能以成堅勁之體也。雨至風來。風生潮上。是水之必隨風也。平野之土。則動植滋蕃。湫隘之地。則草木枯悴。得風不得風故也。風生於東。則東方之土溫。風生於南。則南方之土熱。風生於西。則西方之土涼。風生於北。則北方之土寒。高者風寒。下者風熱。是上下四方之風氣殊。而土俗亦異故。孔子家

語曰。遷風移俗。是土必隨風也。以其殺者言。金之堅也。鼓迅風則熔。木之榮也。值剛風則摧。火之炎也。得暴風則熄。水之溢也。當金風則落。土之濕也。懸高風則乾。故人以春甲乙傷於風者爲肝風。夏丙丁傷於風者爲心風。季夏戊己傷於邪者爲脾風。秋庚辛中於邪者爲肺風。冬壬癸中於邪者爲腎風。其六府之風。未可詳載。以風爲百病之長。善行而數變。行於地。則發屋折木。揚砂石。中於人。則

起毫毛而發腠理也。靈樞以八方虛風爲殺。而孔子家語亦以八方之風爲生。故曰八主風。風生蟲。以風字從凡從虫也。人在天地間亦一蟲也。夫蟲有五。裸蟲者三百六人爲之長。鱗蟲者三百六龍爲之長。介蟲者三百六龜爲之長。羽蟲者三百六鳳爲之長。毛蟲者三百六麟爲之長。故說文曰。風動蟲生。如傷寒六經傳變。獨厥陰風木能令吐衄者。足徵風動蟲生。此天人合一之義也。是以聖人

明生殺消長之道。則能提挈天地。把握陰陽。故盈
天地之間風也。盈天地之間氣也。人能盜天地。則
聚成形而散成風。天地而盜人。則囿於生長壯老
死。故佛經以風輪主持大地。內經曰。神在天爲風。
又曰。太氣舉之風。之與氣。明陰陽者自詳辨焉。

又論曰。風之微也。一紙之隔。則不能過。及其怒也。
拔木折屋。掀海擡山。天地爲之震動。日月爲之蔽
虧。所謂天下之至柔。馳騁天下之至剛者耶。且百

物之生。非風不能長養。而及其肅殺收成之者。亦風也。人居大塊之中。乘氣以行。鼻息呼吸。不能頃刻去風。而及其侵肌中骨。榮衛藏府俱傷。雖盧扁無如之何。至釋氏又謂業風一吹。金石皆成烏有。豈非陶鑄萬物。與天地相終始者哉。蓋天地之中。空洞無物。須得一氣鼓舞動盪其間。方不至毀壞。卽如人之有氣息一般。莊子所謂野馬也。塵埃也。生物之以息相吹也。此息字。亦有二義。有生息之

息。有休息之息。當其生息。便是薰風。及其休息。便是業風。小則爲春夏秋冬。大則爲元會運世。如斯而已。

問曰。病人有氣色見於面部。願聞其說。師曰。鼻頭色青。腹中痛苦冷者死。鼻頭色微黑者。有水氣。色黃者。胸上有寒。色白者。亡血也。設微赤。非其時者死。其目正圓者。症不治。又色青爲痛。色黑爲勞。色赤爲風。色黃者便難。色鮮明者有留飲。

內經曰。精明五色者。氣之華也。故五色微眇。可以目察。鼻者。明堂也。明堂潤澤以清。則無病。今見青。則肝木制其脾土。爲腹痛。若冷。甚則死。水色黑。飲停於中。則黑色見於外。黃見於外。知寒客於胸。靈樞經曰。黃色不可名者。病在胸中。難經曰。脾外症。面黃。豈下經跌陽脉緊。則傷脾。脾傷則面黃乎。或頭中寒濕。但面黃而身不黃乎。不然。何以爲胸上有寒也。內經曰。血脫者。色白。天然不澤。故色白爲

亡血。赤色見於冬。謂非其時。瘕病屬太陽。太陽之脉起於目內眥。故目脉赤而背反張。目者。心之使。神之舍也。神去。則目眊視張而不合。故目正圓。則不治也。腹痛有寒。則色青。房勞傷腎。則色黑。風邪怫鬱於上。則色赤。小便不利於下。則色黃。下經曰。水病。面目鮮澤。有留飲者。則色鮮明也。

察色。靈樞經曰。十二經脉。三百六十五絡。其血氣皆上於面而走空竅。其氣之津液皆熏於面。故

面爲五藏六府之候。是以木形之人。似於蒼帝。其爲人色蒼而面長。火形之人。似於赤帝。其爲人赤色而面銳。土形之人。似於上古黃帝。其爲人黃色而面圓。金形之人。似於白帝。其爲人色白而面方。水形之人。似於黑帝。其爲人黑色而面不平。此五行之人也。山林之民毛而瘦。得木氣多也。川澤之民黑而津。得水氣多也。丘陵之民團而長。得火氣多也。墳衍之民皙而方。得金氣多也。原隰之民豐

而黃。得土氣多也。此五方之民也。雖五形五方之不同。而面之華則主於心。內經曰。心者生之本。神之變也。其華在面。故五氣入鼻。藏於心肺。上使五色脩明。斯爲無病人也。若風則面青。燥則面枯。火則面赤。濕則面黃。寒則面黑。虛則面白。故面黑者爲陰寒。面赤者爲陽熱。青黑而兼見者。爲風爲寒。爲痛。黃白而兼見者。爲濕爲虛爲氣。青白而兼見者。爲虛爲風爲痛也。以五藏五色言之。心王南方。

屬火而色赤。赤爲熱。此人所易知。有寒鬱面赤者。如太陽司天。寒淫所勝。民病面赤。治以熱劑。又有上熱下寒。則面赤而光。下熱上寒。則面赤而鬱。裏寒外熱。則面赤而戴陽。虛勞不足。則頰赤如塗脂。故肝熱則左頰先赤。肺熱則右頰先赤。心熱則頰先赤。脾熱則鼻先赤。腎熱則頤先赤。赤而黃。赤而青。爲相生則吉。赤而黑。爲相剋則凶。經云。赤如鷄冠者生。如衄血者死。若準頭印堂有赤氣。枯天者。

死明潤者生也。如肺病見赤色者爲難治。肝王東方。屬木而色青。青爲寒。爲風。爲痛。又有怒則色青。驚則色青。青而黑。青而紅。爲相生則吉。青而枯白者。爲相尅則凶也。故經曰。青如翠羽者生。青如草滋者死。如脾病見青色。爲難治。脾王中央。屬土而色黃。黃爲濕。爲熱。爲虛。而有明暗之分。挾熱則色鮮明。挾濕則色昏滯。女勞酒疸則色昏黑。黃而白。黃而紅。相生則吉。若黃而青。相尅則凶也。故經曰。

黃如蠟腹者生。黃如枳實者死。若準頭年壽印堂有黃氣。明潤者病退。及目瞼黃皆爲欲愈。枯燥而夭者死。長夏見黃則吉。若黃青則凶也。肺王西方。屬金而色白。白爲虛爲寒。有悲愁不樂則色白。有脫血奪氣。脫津液則色白。又太陽終者其色白。少陽終者其色青白。凡印堂年壽。白而光潤者吉。故經曰。白如豚膏者生。白如鵝羽者生。白如枯骨者死。白如鹽者死。若白而黃。相生則吉。白而赤相尅。

則凶也。腎王北方。屬水而色黑。內經曰。腎病則面
如漆柴。故黑者爲寒。爲痛。有恐則色黑。憂則色黑。
水證則色黑。又瘦而多火之人。則色黑。未可泥於
寒。則色黑也。又有胃病則顏黑。少陰終者面黑。太
陰終者皮毛面焦黑。若黑色出於庭。大如拇指。必
不病而卒死。病人黑出於額上髮際下。直鼻脊兩
額上者亦死。病人黑氣出天中。下至年上額上者
死。病人及健人面忽如馬肝色。望之如青。近之如

焦黑者死。病人耳目鼻口有黑色起入於口者必死。又視準頭年壽印堂黑氣枯天者死。黑中明潤者生也。故經曰。黑如烏羽者生。黑如炁者死。若心病黑氣見於面者死也。大抵黑色見於面多凶。凶則死。黃色見於面多吉。吉則不死。故五色之中兼見黑者其病甚。兼見黃者其病減也。內經曰。五色微診可以目察。察色觀氣。大畧如此。夫望而知之。自古及今能有幾人。學者固不能入神。直可棄而

不講當於風鑑中求其精蘊可也。

師曰。病人語聲寂然。喜驚呼者。骨節間病。語聲喑喑然不徹者。心膈間病。語聲啾啾然細而長者。頭中病。內經曰。肝主筋。肝在聲爲呼。又曰。諸筋皆屬於節。骨節間病。故令喜驚呼也。靈樞經曰。何道之塞。何氣出行。使音不彰。心膈間病。則阻塞其息道。故令喑喑然而不徹也。頭在上於位。爲近。故語聲啾啾。內無阻塞。則聲音能發至下。故語聲細而長也。

聽音。萬物有竅則鳴。中虛則鳴。肺葉中空而有

二十四空。肺梗硬直而有十二重樓。故內經以肺

屬金而主聲音。十二重樓之上為會厭。喉間會厭

薄膜

為聲音之戶。舌為聲音之機。唇為聲音之扇。三者

相須則能出五音而宣遠達近音者。雜比也。聲者

單出也。鼻能聲而不能音者。以無唇之開闔。舌之

啟閉。其氣則走頰頰之竅達畜門。出鼻孔而為聲。

聲音之道。分之則二。故得天地之和。五藏安暢。則

氣藏於心肺。聲音能彰。五藏者。中之守也。各有正聲。中盛則氣騰。中衰則氣弱。脾應宮。其聲湯以緩。肺應商。其聲促以清。肝應角。其聲呼以長。心應徵。其聲雄以明。腎應羽。其聲沉以細。此五藏之正音。得五藏之守者也。失守。則心變動爲笑。肝變動爲呼。脾變動爲歌。肺變動爲哭。腎變動爲呻。其聲促者肺病。雄者心病。漫者脾病。呼者肝病。沉者腎病。聲長者大腸病。聲短者小腸病。聲速者胃病。聲清

者膽病。聲微者膀胱病。聲呼漫者肝膽二藏相尅也。聲速微細者胃與膀胱相尅也。聲輕者虛也。聲細長者痢也。聲沉粗者風也。聲短細者氣也。聲短遲者瀉脫也。聲如從室中者中氣之濕也。言而微終日乃復言者此奪氣也。譫妄不避親疎者此神明之亂也。欲聲言意不續者陰陽失守也。此五藏六府之病音。失五藏之守者也。以上出太上天寶太素 脉之欠者無病也。脉之呻者病也。言遲者風也。搖頭言

者裏痛也。三言三止者。詐病也。鼻鳴者。風中於衛也。腸鳴者。腹中有寒也。喉中如水雞聲者。欬逆上氣也。故聖人視喘息聽音聲。而知所苦也。華佗曰。陽侯多語。陰證無聲。多語者易濟。無聲者難榮。不唯審音以知病。亦且識其死生。內經曰。絃絕者其音嘶。病深者其聲噦。聲音之道。直可不辨而忽諸。師曰。息搖肩者。心中堅。息引胸中上氣者。欬。息張口短氣者。肺痿吐沫。

心中堅則氣道不利。故喘息動形而肩搖也。肺氣逆者必欬。肺氣虛者必短。欬而短氣必爲肺痿吐涎沫之證。

師曰。吸而微數其病在中焦實也。當下之卽愈。虛者不治。在上焦者其吸促。在下焦者其吸遠。此皆難治。呼吸動搖振振者不治。

吸而微數卽喘也。難經曰。吸入腎與肝。中焦實則礙其息道。是以吸而微數也。經曰。短氣腹滿而喘。

可攻裏也。又曰。時有微熱。喘冒不能卧者。有燥屎也。皆以大承氣下之。此中焦實而下之。卽愈矣。靈樞經曰。營出於中焦。若中焦不實而不可下。則營氣衰微。故不治也。上焦開發。宣五穀味。則宗氣積於胸中。下焦爲氣之海。出衛氣以溫分肉。故上焦氣虛則吸促。下焦氣虛則吸遠。皆曰難治。若呼吸動搖振振。則營氣衛氣宗氣不歸其部。三焦無所仰。故曰不治也。

師曰。寸口脉動者。因其王時而動。假令肝王色青。四時各隨其色。肝色青而反色白。非其時色脉皆當病。寸口者。脉之大會。故因其王時而動。假令肝色青。脉弦。今色白脉浮。故非其時色脉皆當病。四時準此。

問曰。有未至而至。有至而不至。有至而太過。何謂也。師曰。冬至之後。甲子夜半少陽起。少陽之時陽始生。天得溫和。以未得甲子。天因溫和。此爲

未至而至也。以得甲子。而天未溫和。此爲至而不至也。以得甲子。而天大寒不解。此爲至而不去也。以得甲子。而天溫如盛夏五六月時。此爲至而太過也。

冬至者。歲終之節。甲子日者。陰陽所始之數也。少陽者。膽也。膽者。木也。生於水。故起夜半。其氣常微少。故言少陽云。夜半子者。水也。

內經曰。謹候其時。氣可與期。十一月斗指子爲冬至。邵子曰。冬至子之半。天心無改移。正氣未子初。一陽初動。在貞元之間。是造化之真機。無中含有。

陰極而陽生。陽氣動於黃泉之下也。故仲景候少陽之氣。以知太過不及。以見天地之心。少陽者。一陽也。得其候。則生化之氣正。失其候。則勝復之變生。是以岐伯曰。應則順。否則逆。逆則變生。變生則病。帝曰。請言其應。岐伯曰。物生其應也。氣脈其應也。人在氣交中。亦與天地相應。當順時而不可反候。故月令曰。冬至之日。齋戒慎處。必檢身心。去聲色。禁嗜欲。安神性。以待陰陽之所定。此少陽方生。

陰未退聽故也。人身之氣得其和。為來春發生之本。天地之氣無偏勝。為來歲化育之根。豈特太過不及生病而已哉。紀氏即以冬至之日。夜半少陽起。以候太過不及。詳難經集註。

師曰。病人脉浮者在前。其病在表。浮者在後。其病在裏。腰痛背強不能行。必短氣而極也。

關前浮者病在表。關後浮者病在裏。即尺脉浮則傷腎。腎傷則腰痛背強而不能行。腎為生氣之源。虛則短氣而極也。

問曰。經云。厥陽獨行。何謂也。師曰。此爲有陽無陰。故稱厥陽。

厥陽。卽陽厥也。以其入秋冬。奪於所用。有陽無陰。內經謂腎氣日衰。陽氣獨勝。故手足爲之熱。此厥陽獨行之義也。

問曰。寸脉沉大而滑。沉則爲實。滑則爲氣。實氣相搏。厥氣入藏卽死。入府卽愈。此爲卒厥。何謂也。師曰。唇口青。身冷。爲入藏卽死。如身和。汗自出。爲入府卽愈。

此卽陰厥也。寸口得沉滑之脈。乃實氣相搏。卽爲厥氣。厥氣逆氣也。逆氣入藏。則身冷唇口青。故死。逆氣入府。得身和汗自出。故愈。卽下文病在外者可治。入裏者卽死之義。

問曰。脈脫入藏卽死。入府卽愈。何謂也。師曰。非爲一病。百病皆然。譬如浸淫瘡。從口起。流向四肢者可治。從四肢流來入口者不可治。病在外者可治。入裏者卽死。

經曰。趺陽脉不出。脾不上下。身冷膚鞭。又曰。少陰脉不至。腎氣微少。精血爲尸厥。卽脉脫之謂也。厥氣入藏則脉脫而死。入府則脉不脫而愈。固知病從內之外者可治。從外之內者難療。舉浸淫瘡以喻之。則百病皆然也。

問曰。陽病十八。何謂也。師曰。頭痛。項腰脊臂脚掣痛。陰病十八。何謂也。師曰。欬。上氣喘。噎咽。腸鳴。脹滿。心痛。拘急。五藏病各有十八。合爲九十病。人又有六微。

微有十八病。合爲一百八病。五勞七傷。六極。婦人三十六病不在其中。清邪居上。濁邪居下。大邪中表。小邪中裏。穀飪之邪。從口入者。宿食也。五邪中人。各有法度。風中於前。寒中於暮。濕傷於下。霧傷於上。風令脉浮。寒令脉急。霧傷皮膚。濕流關節。食傷脾胃。極寒傷經。極熱傷絡。

陽病屬表而在經絡。故一頭痛。二項。三腰。四脊。五臂。六脚掣痛。此病在三陽。三六十一十八病。陰病屬

裏而在藏府故一欬。一上氣喘。二噦。四咽。五腸鳴。
脹滿。六心痛拘急。此病在三陰。三六二十八病。合
爲九十病也。六微五勞七傷。詳千金方。三十六病。
千金載十二癰。九痛。七害。五傷。三癰不通。共三十
六病。清邪居上。霧傷於上也。濁邪居下。濕傷於下
也。風寒卽大邪。故從表入。榮飪卽小邪。故從口入。
卽後食傷脾胃也。五邪謂風寒濕霧熱。風中於前。
卽風傷衛。寒中於暮。卽寒傷營。霧爲清邪。則易傷。

皮腠濕爲濁邪。則易流關節。循內者爲經。浮外者爲絡。寒傷榮則傷經。熱傷氣則傷絡也。

問曰。病有急當救裏救表者。何謂也。師曰。病醫下之。續得下利。清穀不止。身體疼痛者。急當救裏。後身體疼痛。清便自調者。急當救表也。

病者身疼痛。屬表。醫誤下之。得下利清穀。故急當救裏。得裏和。然後救表。內經曰。先病爲本。後病爲標。病發而不足。標而本之。先治其標。後治其本也。

夫病痼疾。加以卒病。當先治其卒病。後乃治其痼疾也。

夫病有標本。治有緩急。痼病爲本。爲緩。卒病爲標。爲急。急則治其標。緩則治其本。

師曰。五藏病。各有得者愈。五藏病。各有所惡。各隨其所不喜者爲病。病者素不應食。而反暴思之。必欲熱也。暴思之。裏全善作暴食之。爲是。

內經云。肝色青。宜食甘。心色赤。宜食酸。脾色白。宜

食苦。脾色黃。宜食醢。腎色黑。宜食辛。此五藏得飲
食而愈者。肝病愈於丙丁。起於甲乙。心病愈於戊
巳。起於丙丁。脾病愈於庚辛。起於戊巳。肺病愈於
壬癸。起於庚辛。腎病愈於甲乙。起於壬癸。此五藏
自得其位而愈者。五藏所惡。心惡熱。肺惡寒。肝惡
風。脾惡濕。腎惡燥。各隨其所惡而不喜者爲病也。
若病人素不食而暴食之。則食入於陰。長氣於陽。
必發熱也。

夫諸病在藏欲攻之當隨其所得而攻之。如渴者與猪苓湯餘皆倣此。

渴者與猪苓湯若汗出多而渴者則不可與。擬欲攻之隨其得宜而用。舉此爲例餘可類推。

瘧濕暍病脉證第二

太陽病發熱無汗反惡寒者名曰剛瘧。一作瘧

郭白雲曰瘧是病名如中風傷寒之類也。瘧是病證如結胸痞氣之類也。瘧爲輕瘧爲重瘧而又瘧

者爲尤重。瘧之發柔軟。瘧之發剛硬。二字當有別也。瘧病者。以太陽病發汗太多。榮血已亡。風寒易中。故筋脉勁急。作剛。柔二瘧也。寒邪內入於榮。鬱於肌膚。則發熱。凝其血脉。則無汗。無汗爲表實。不應惡寒。今反惡寒者。以寒邪嚴厲。從衛入榮。衛亦因之而不鬯。故反惡寒也。其瘧故名曰剛。

太陽病。發熱汗出而不惡寒。名曰柔瘧。

風傷於衛。則發熱。開其腠理。則汗出。汗出當惡寒。

今不惡寒者。以風爲陽邪。木性曲直和爽。雖汗出亦不惡寒。其瘥故名曰柔。

太陽病發熱。脉沉而細者。名曰瘥。爲難治。

太陽病發熱。指表而言也。若脉沉遲。可用枳朮桂枝湯解肌。今脉沉而細。細爲氣少。未可以解表。故難治。

太陽病發汗太多。因致瘥。

內經曰。奪汗者無血。血虛則風寒易傷筋脉。得寒

則引急故令病瘥。

夫風病下之則瘥。復發汗必拘急。

風傷於衛。若下之。虛其陰血。風乘其虛而陷於榮血之中。血不榮筋。因作瘥。四肢爲諸陽之本。復發汗以虛其陽。必令四肢拘急。

瘥家雖身痛。不可發汗。汗出則瘥。

瘥家則過於亡血。雖有身疼表證。亦不可發汗。若汗之。是重虛其陽。陽虛必作瘥也。

病者身熱足寒頸項強急惡寒時頭熱面赤目赤獨
頭動掣卒口噤背反張者瘕病也。

身熱頭熱邪在太陽也面赤目赤

足陽明之正繫目系邪在

陽明也頸屬陽明項屬太陽邪在二經則頸項強
急惡寒也陽明之脉挾口故卒口噤太陽之脉循
背上頭故頭獨掣背反張也此其人必汗下亡血
之後正氣已虛而邪氣但勝於上其足則寒此瘕
之證具見也

若發其汗者。寒熱相搏。其表益虛。卽惡寒甚。發其汗已。其脉如蛇。暴腹脹大者。爲欲解。脉如故。反伏弦者。瘥。

此承上文而言。如上諸證。若誤發之。汗出則衣裏冷濕。又成寒濕相搏之證。其陽益虛。則較前惡寒更甚矣。其脉如蛇。暴腹脹大。爲欲解。於理不順。脉伏弦。卽後條伏堅之意。

夫瘥脉按之緊如弦。直上下行。

經曰脉弦者產寒令脉緊。緊則如轉索無常有近於弦。故曰緊如弦。以其勁急。故直上下行。產病有灸瘡難治。

有灸瘡。則焦骨傷筋。血脉未復。枯婁桂枝葛根二湯皆近於解表。非灸瘡所宜。故云難治。

脉經曰。產家其脉伏堅。無上下。

前條按之緊。今脉伏堅。亦近於緊也。寒則諸脉勁急。故有直上下之稱。

太陽病其證脩。身體強。凡凡然。脉反沉遲。此爲瘧。栝
藡桂枝湯主之。凡音殊

太陽病其證脩。言頭痛。項強。發熱。惡風寒。具見也。
太陽陽明合病。則身體強。凡凡。俯仰不自如之貌。
太陽傷寒。則脉浮緊。中風則脉浮緩。今脉反沉遲。
與風寒有異。故爲瘧病。

按說文凡字無鈎挑。有鈎挑者。乃几案之凡字也。
凡乃鳥之短羽。象小鳥毛羽未盛之形。飛凡凡也。
故凡字從几。蓋形容
其頸項強急之意。

栝蒌桂枝湯方

栝蒌根

二兩

桂枝

三兩

芍藥

三兩

甘草

二兩

生薑

三兩

大棗

十二枚

右六味。以水九升。煮取三升。分溫三服。取微汗。汗不出。食頃啜熱粥發。

內經曰。肺移熱於腎。傳為柔瘕。麗安常曰。栝蒌根不主項強。凡凡其意以肺熱不令移於腎也。加之於桂枝湯中。則可以微熟榮筋。調和榮衛。不待疏

而躡自至矣。

太陽病無汗而小便反少。氣上衝胸。口噤不得語。欲作剛瘧。葛根湯主之。

剛瘧爲寒邪。無汗小便少者。寒主收引也。氣上衝胸者。寒邪上逆也。口噤不語者。寒令牙關緊也。此欲作剛瘧之象。

葛根湯方

葛根 四兩

麻黃 三兩 去節 桂 二兩 去皮

芍藥

二兩

甘草

二兩炙

生薑

三兩

大棗

十二枚

石七味。咀咬。以水一斗。先煮麻黃葛根減二升。去沫。內諸藥煮取三升。去渣。溫服一升。覆取微似汗。不須啜粥。餘如桂枝湯法。將息。及禁忌。

麻黃葛根以發其陽。則汗自出而口噤自開。桂枝通血脈。芍藥和陰血。則小便自通而衝氣自止。生薑之辛以散逆。甘草大棗之甘以和胃。則經絡疏

通。內外柔和。而強急可愈。

瘧爲病。胸滿。口噤。卧不着席。脚攣急。必齧齒。可與大承氣湯。

胸滿卽氣上衝胸之互文。卧不着席。亦反張之互詞也。龐安常曰。瘧病卧不着席者。小兒腰背去席二指。大人手側掌爲難治。邪在太陽。則攣急。邪在陽明。則口噤。靈樞經曰。熱而瘧者。腰折。瘵癰。齒噤。齧齧。切齒也。噤之甚者。則切。靈樞熱病篇有齧齒。

金匱要略卷之九
當是齟齬之類。瘡病屬表屬虛。未可與承氣下也。
當詳之。

太陽病關節疼痛而煩。脉沉而細者。此名濕痺。濕痺
之候。小便不利。大便反快。但當利其小便。

太陽病。脉沉細。若背反張則瘡病。關節疼痛則濕
病也。內經曰。濕流關節。關節者。谿谷之會。邪與正
爭。則疼痛而煩也。以其疼痛。故名濕痺。內經曰。脾
惡濕。濕淫於內。則橫流不遵故道。故小便不利而

大便反快。如濕勝則濡泄也。濕家不利小便。則非其治。利小便者。引其遵故道而行也。

濕家之爲病。一身盡疼。發熱。身色如熏黃也。

脾主身之肌肉。濕爲寒邪。鬱於肌中。不得散。則一身盡疼。發熱也。陽明發熱。則黃色鮮明如橘子。太陰寒濕。則黃色黧暗如烟熏。

濕家其人。但頭汗出。背強。欲得被覆向火。若下之。蚤則噦。或胸滿。小便不利。舌上如胎者。以丹田有熱。胸

上有寒。渴欲得水而不能飲。則口燥煩也。

濕爲陰邪。陰邪客於陰。則陽上越而不行於腠理。肌肉。故但頭汗出。背爲陽。寒濕勝則陽虛。故背強。欲得被覆向火也。若下之虛其胃。濕干於胃。則令噦。寒客於上。則胸滿。亡其津液。則小便不利。以寒濕在上。故舌上如胎而實非胎也。丹田有熱者。以下後裏虛。上焦陽氣因虛而陷於下焦。爲丹田有熱。表中寒氣乘虛而客於胸上。爲胸上有寒。唯其

丹田有熱。則渴欲飲水。胸上有寒。不能散水。雖得水而不能飲。故口燥煩也。

濕家下之。額上汗出。微喘。小便利者。死。若下利不止者。亦死。

濕不能越於肌膚。則頭汗。今但額上汗出。此孤陽上脫也。面黃而喘。汗出短氣。皆濕邪內勝。今但微喘。此正氣衰微也。濕家小便利。則濕去。今氣衰不能禁制。則小便利也。故死。若下利不禁。則五藏

氣絕於內矣。茲條爲治濕誤下之明禁。

風濕相搏。一身盡疼。痛法當汗出而解。值天陰雨不止。醫云。此可發汗。汗之病不愈者。何也。蓋發其汗。汗止者。但風氣去。濕氣在。是故不愈也。若治風濕者。發其汗。但微微似欲汗出者。風濕俱去也。

風陽邪也。濕陰邪也。風善行。相搏則一身盡疼。身疼屬表。其在表者。汗而發之。以後諸方。皆微取汗。若汗出如水流漓。則病不除。反傷正氣。而濕不去。

但微微似欲汗。則風散濕除。此治風濕相搏之法也。茲條爲治濕大汗之嚴律。

濕家病。身疼發熱。面黃而喘。頭痛鼻塞而煩。其脉大。自能飲食。腹中和無病。病在頭中寒濕。故鼻塞。內藥鼻中則愈。

經曰。清邪中上。陽中霧露之氣。必發熱。頭痛身疼。面黃而喘。鼻塞而煩。脉大能食。皆上焦陽分受邪。不干中焦。則腹中和無病也。頭中寒濕者。申上文

金匱要略直解卷之八
三
之意。寒以濕之性言。臭氣通於天內。藥鼻中。以宣泄其寒濕。

濕家身煩疼。可與麻黃加朮湯發其汗。慎不可以火攻之。

身疼煩。濕淫於外也。故可汗而泄。若以火攻之。則濕熱相搏。血氣流溢。迫而爲衄。鬱而爲黃。非其治法。

麻黃加朮湯方

麻黃

二兩去節

桂枝

二兩去皮

甘草

一兩炙

杏仁

七十个去皮尖

白朮

四兩

右五味。以水九升。先煮麻黃減二升。去上沫。內諸藥。煮取二升半。去滓。溫服八合。覆取微似汗。白朮逐皮間風水結腫。加於麻黃湯中。爲風能勝濕之劑。

病者一身盡疼。發熱日晡所劇者。名風濕。此病傷於汗出當風。或久傷取冷所致也。可與麻黃杏仁薏苡

甘草湯。

一身盡疼發熱。風濕在表也。日晡申時也。陽明王於申酉戌。土惡濕。今爲風濕所干。當其王時。邪正相搏。則反劇也。汗亦濕類。或汗出當風而成風濕者。或勞傷汗出。而入冷水者。皆成風濕病也。

麻黃杏仁薏苡甘草湯方

麻黃

去節半兩湯炮

甘草

一兩炙

薏苡仁

半兩

杏仁

十个去皮尖炒

右剉麻豆大。每服四錢。水一盞半。煮八分。去滓。
溫服。有微汗。避風。

麻黃杏仁以去風。薏苡仁以去濕。甘草以和榮衛。
風濕脉浮身重。汗出惡風者。防已黃耆湯主之。

寒濕則脉沉細。風濕則脉浮。身重而不疼痛者。風
濕微也。風傷於衛。則腠理開。開則汗出惡風。防已
黃芪湯以去風濕。

防已黃芪湯方

防己 一兩
甘草 半兩炒
白朮 七錢半

黃芪 一兩一分去蘆

右剉麻豆大每抄五錢七生薑四片大棗一枚
水盞半煎八分去渣溫服良久再服
喘者加麻黃半兩
胃中不和者加芍藥三分
氣上衝者加桂枝三分
下有陳寒者加細辛三分
服後當如蟲行皮中從腰下如冰後坐被上
又以一被繞腰下溫令微汗差

防已。療風腫水腫。故以爲君。白朮治皮間風水結
腫。故以爲臣。生薑主逐風濕。故以爲佐。三味去風
行濕藥也。風濕去。則榮衛虛。黃芪大棗甘草爲使。
用以養正除邪。調和榮衛。爲治風濕之緩劑。風
濕勝於上。則喘。加麻黃以定喘。風濕勝於中。則
胃不和。加芍藥以緩中。風濕勝於下。則氣上冲。
加桂枝以伐腎邪。下有陳寒留而不散。再加細
辛以溫中利水。如蟲行皮中者。風濕行也。腰已

下如大指下有陳寒而言。故令重被圍繞於腰間。
覆令微汗出也。

傷寒八九日。風濕相搏。身體疼煩。不能自轉側。不嘔。
不渴。脉浮虛而濇者。桂枝附子湯主之。若大便堅。小
便利者。去桂。加白朮湯主之。

風溼所勝。則身體煩疼。濕淫所勝。則身體難轉側。
風濕相搏於榮衛之間。不干於裏。故不嘔不渴也。
脉浮爲風。濇爲濕。以其脉有近於虛。故用桂枝附

子湯溫經以散風濕

桂枝附子湯方

桂枝

四兩去皮

生薑

三兩切

附子

三枚炮去皮破八片

甘草

二兩炙

大棗

十二枚擘

右五味以水三升。煮取一升。去滓。分溫三服。方

中加白朮去桂。卽是白朮附子湯。服白朮附子

湯後覺身痺。半日許再服。三服都盡。其人如冒

狀。勿怪。卽是朮附并走皮中。逐水氣。未得除故

耳。

桂枝甘草。辛甘以發散風邪。附子生薑。辛熱以溫經逐濕。大棗引辛溫之藥而通十二經脈。此風濕相搏之重者。故用此辛熱之藥。以除風逐濕也。小便利者。大便必鞭。桂枝近於解肌。故去之。白朮能生津液。故加之也。凡方中有如蟲行狀。如醉狀。如冒狀者。皆藥勢將行使然也。

風濕相搏。骨節疼煩。掣痛不得屈伸。近之則痛劇。汗

出短氣小便不利惡風不欲去衣或身微腫者甘草
附子湯主之。

此風濕之最重者。濕爲陰邪則疼。風爲陽邪則煩。
風濕搏於關節之間。注經絡流骨髓則煩疼。掣痛
不得屈伸。近之則痛劇也。汗多陽虛則短氣也。小
便不利裏濕不行也。以其汗多陽虛則惡風。以其
小便不利則濕氣外薄。外薄則身有微腫也。或未
定之詞。若不薄則不腫矣。

甘草附子湯方

甘草

二兩炙

附子

二枚炮
去皮

白朮

二兩

桂枝

四兩去皮

右四味以水六升煮取三升去滓溫服一升日
三服初服得微汗則解能食汗出復煩者服五
合恐一片多者服六七合爲妙

附子能溫經散濕白朮能勝濕燥脾桂枝能通行
榮衛甘草能益氣和中斯成固表散濕之重劑

太陽中暍發熱惡寒身重而疼痛其脈弦細扎遲小便已洒洒然毛聳手足逆冷小有勞身卽熱口開前板齒燥若發其汗則惡寒甚加溫鍼則發熱甚數下之則淋甚。

內經曰先夏至爲病溫後夏至爲病暑又曰熱病者皆傷寒之類也以其太陽受病與傷寒相似亦令發熱惡寒身重而疼痛也內經曰寒傷形熱傷氣氣傷則氣消而脈虛弱所以弦細扎遲也小便

已毛。身。陽氣內陷。不能衛外。手足亦逆冷也。勞動則擾乎陽。故小勞身即熱也。內經曰。因於暑。汗煩則喘渴。故熱盛則口開。口開則前板齒燥也。發汗虛其陽。則惡寒甚。溫鍼動火邪。則發熱甚。下之亡津液。則淋甚也。

太陽中熱者。喝是也。汗出惡寒。身熱而渴。白虎加人參湯主之。

風傷於衛。邪勝則汗出惡寒。此熱傷氣正虛。亦汗

出惡寒也。內熱則津竭，外熱則汗多。與白虎加人參以除表裏之邪熱。

白虎加人參湯

知母

六兩

石膏

一斤碎

甘草

二兩

粳米

六合

人參

三兩

右五味以水一斗。煮米熟。湯成去滓。溫服一升。日三服。

白虎，西方神名也。其令爲秋。其政清肅。涼風至。白

露降則溽暑潛消。以此湯有微暑熱之功。行清肅
之政。故以白虎名之。表有熱者。散以石膏之辛寒。
裏有熱者。降以知母之甘苦。熱則氣傷。人參用以
生津而益氣。石膏過於寒涼。甘草粳米之甘。用以
和胃補中。共除中熱而解表裏。

太陽中暍。身熱疼重而脈微弱。此以夏月傷冷水。水
行皮中。所致也。一物瓜蒂湯主之。

脈虛身熱。得之傷暑。此證先中於熱。再傷冷水。水

氣留於腠理皮膚之中。則身熱疼重也。與瓜蒂湯以散水氣。

一物瓜蒂湯

瓜蒂 二七个

右剉以水一升。煮取五合。去滓頓服。

本草云。瓜蒂味苦寒。主大水身面四肢浮腫。用之以散皮膚水氣。苦寒又可勝熱也。

百合狐惑陰陽毒病證治第三

論曰百合病者百脉一宗悉致其病也。意欲食復不能食常默默然欲卧不能卧欲行不能行飲食或有美時或有不用聞食臭時如寒無寒如熱無熱口苦小便赤諸藥不能治得藥則劇吐利如有神靈者身形如和其脉微數每渴時頭痛者六十日乃愈若渴時頭不痛漸然者四十日愈若溺快然但頭眩者二十日愈其證或未病而預見或病四五日而出或病二十日或一月微見者各隨證治之。

微見千金作後見。

經脉十二絡脉三百六十五。此緣大病後真陽已
虛。餘熱未盡。周身百脉俱病。是爲百脉一宗。悉致
其病也。以其中外上下皆病。故飲食行卧不安。寒
熱無定。而諸藥不能治。得之則吐利。如有神靈也。
常默默則身形如和。餘熱不盡。故脉微數。熱在上
則口苦。熱在下則便赤也。傷寒續論曰。溺者人之
津液也。注於膀胱。得陽氣施化則溺出。故內經曰。
膀胱者州都之官。津液藏焉。氣化則能出矣。是溺

與陽氣相依而爲用者也。頭者諸陽之首。溺則陽氣下施。頭必爲之搖動。曷不以老人小兒觀之。何者。小兒元氣未足。血氣未定。腦髓不滿。溺將出。頭爲之搖。而身爲之動。此陽氣不充故耳。老人氣血衰。肌肉澁。腦髓清。故溺出時不能射遠。將完必濕衣。而頭亦爲之動者。此陽氣已衰。不能施射故耳。由此觀之。溺出頭之痛與不痛。可以觀邪之淺與深矣。故百合病溺出頭痛者。言邪舍深而陽氣衰。

也。內衰則入於藏府。上則牽連腦髓。是以六十日愈。若溺出頭不痛。漸漸然者。漸漸如水洒。漸皮毛外。舍於皮膚肌肉。尚未入藏府之內。但陽氣微耳。是以四十日愈。若溺出快然。但頭眩者。言邪猶淺。快則陰陽和暢。榮衛通利。藏府不受邪。外不漸漸然。則陽氣尚是完固。但頭眩者。是邪在陽分。陽實則不爲邪所牽。故頭不疼而眩。是以二十日愈也。或未病而預見者。皆元氣空虛之故。

百合病發汗後者。百合知母湯主之。

百合知母湯方

百合

七枚

知母

三兩切

右先以水洗百合。漬一宿。當白沫出。去其水。更以泉水二升。煎取一升。去滓。別以泉水二升。煎知母取一升。去滓。後合和煎取一升五合。分溫再服。

百合病。下之後者。滑石代赭湯主之。

滑石代赭湯方

百合

七枚擘

滑石

三兩碎綿裹

代赭石

如彈丸大二枚碎綿裹

右先以水洗百合。漬一宿。當白沫出。去其水。更以泉水二升煎取一升。去滓。別以泉水二升煎滑石。代赭取一升。去滓。後合和重煎。取一升五合。分溫服。

百合病吐之後者。用後方主之。

百合鷄子湯方

百合 七枚 擘 雞子黃 一枚

右先以水洗百合，漬一宿，當白沫出，去其水，更以泉水二升煎取一升，去滓，內雞子黃攪勻，煎五分，溫服。

百合病不經吐下發汗，病形如初者，百合地黄湯主之。

百合地黄湯方

百合 七枚 擘 生地黄汁 一升

右以水洗百合。漬一宿。當白沫出。去其水。更以
泉水二升煎取一升。去滓。內地黃汁。煎取一升五
合。分溫再服。中病勿更服。大便常如漆。如漆。地黃汁也。
百合病。一月不解。變成渴者。百合洗方主之。

百合洗方

右以百合一升。以水一斗。漬之一宿。以洗身。洗
已。食煮餅。勿以鹽豉也。

百合病。渴不差者。栝樓牡蠣散主之。

栝樓牡蠣散方

栝樓根

牡蠣

熬等分

右爲細末。飲服方寸匕。日三服。

百合病變發熱者。百合滑石散主之。

百合滑石散方

百合

一斤

滑石

三兩

右爲散。飲服方寸匕。日三服。當微利者。止服。熱則除。

百合花葉根皆四向。故能通達上下四旁。其根以衆瓣合成。故名百合。用之以治百脉一宗之病也。知母除邪而補虛。故汗後宜之。代赭之重以鎮虛邪。滑石之甘以分水道。故下後宜之。鷄子黃入胃補虛。故吐後宜之。百合病緣以餘熱不除。若變發熱者。加滑石以通利之。則熱除矣。神農經曰。百合能通大小便。內服則恐耗津液。故渴者漬水以洗之。渴若不差。苦瓠能生津歛液。栝樓牡蠣散以治

之。此皆病後而見者。各隨證治。若不經汗吐下。病
形如初。未病而見者。用地黃純陰之品。養血而除
邪熱。通血脈而補不足也。

郭白雲曰。仲景以藥之百合。治百合病。與神農經
主治不相當。千古難曉其義。是以孫真人言。傷寒
雜病。自古有之。前古名賢。多所防禦。至於仲景時
有神功。尋思肯趣。莫測其致。所以醫人不能鑽仰
萬一也。然百合之爲物。豈因治百合之病。而後得

名哉。或是病須百合可治。因名曰百合乎。少時見先生言。以百合湯治一僕病得愈。余是時未甚留意。不解仔細詳看。雖見其似寒似熱似饑似飽欲行欲臥。如百合之證。又自呼其姓名。有終夕不絕聲。至醒問之。皆云不知。豈所謂如有神靈者耶。

百合病見於陰者。以陽法救之。見於陽者。以陰法救之。見陽攻陰。復發其汗。此爲逆。見陰攻陽。乃復下之。此亦爲逆。

百合病得之於陰陽俱虛。此言不可下。不可汗也。見陽不足。則調其陰以養陽。見陰不足。則和其陽以養陰。內經曰。用陰和陽。用陽和陰。是卽以法救之之意。豈一汗下便盡治百合之法乎。以上諸證。有一可汗下者乎。觀者無泥。

狐惑之爲病。狀如傷寒。默默欲眠。目不得閉。卧起不安。蝕於喉。爲惑。蝕於陰。爲狐。不欲飲食。惡聞食臭。其面目乍赤乍黑乍白。蝕於上部則聲啞。甘草瀉心湯。

主之

此證因傷寒而變斯疾。故初得猶狀傷寒。病後腸胃空虛而有熱。則蟲上下作。蟲上作。則蝕咽喉爲噎。蟲下作。則蝕二陰爲狐。靈樞經曰。蟲動則令人倦心。是以起卧不安。雖默默欲眠而目不得閉。蟲聞食臭。則求食。故惡聞食臭而不欲飲食也。蟲動胃虛。則面目之色無定。是以乍赤乍黑乍白也。

郭白雲曰。狐惑蠱病。多因醫者汗吐下太過。又利

小便重亡津液熱毒內攻藏府焦枯蟲不得安故
上下求食亦有不發汗內熱焦枯而成者凡人之
喉及陰肛比他肌肉津潤故蟲緣津潤而食之蠱
病又不止因傷寒而成多自下感或居濕地或下
利久而得當於蠱證中求之然狐惑雖兩疾其
治法不相遠矣。

甘草瀉心湯方

甘草 四兩

黃芩

人參

乾薑 各三兩
黃連 一兩
大棗 十二枚

半夏 半升

右七味。水一斗。煮取六升。去渣。再煎。溫服一升。
日三服。

咽傷則聲變。故蝕上部則聲啞。人參甘草大棗之
甘以益氣。黃芩黃連之苦以殺蟲。乾薑半夏之辛
以安胃。

蝕於下部則咽乾。苦參湯洗之。蝕於肛者。雄黃散熏

之。

苦參湯方

本方闕今以麗安常苦參湯補之

苦參

半斤

槐白皮

狼牙根

各四兩

右剉以水五升煎三升半洗之。

雄黃散方

雄黃

右一味爲末。筒瓦二枚合之燒向肛熏之。

下部餽則津液竭於下。上則咽乾也。藥力難沉於

下極故用熏洗之法。苦參槐皮狼牙之苦寒以殺
蟲。雄黃之辛溫以熏驅。

病者脉數無熱微煩默默但欲卧汗出初得之三四
日日赤如鳩眼七八日目四眥黑若能食者膿已成
也。赤小豆當歸散主之。皆字應安當作周字

經曰數爲虛虛則無熱也無熱但微煩默默欲卧
卧則氣不衛外而行於陰故汗出也。內經曰五藏
六府之精華皆上注於目邪氣薰蒸三四日邪氣

微則目赤。七八日邪氣深則目四周黑也。能食者邪氣散漫不在藏府而在陰肛。爛肉腐肌而成膿矣。

赤豆當歸散方

赤小豆

三升浸令芽去曝乾 當歸

右二味杵爲散漿水服寸匕。

當歸主惡瘡瘍。赤小豆主排癰膿。漿水能調理藏府。三味爲治癰膿已成之劑。此方餌於肛門者當

用之按後先血後便此近血也亦用此湯以大腸
肛門本是一源病雖不同其解藏毒則一也

漿酢也炊粟米熟投冷水中
浸五六日生白花色類漿者

陽毒之爲病面赤斑斑如錦文咽喉痛唾膿血五日
可治七日不可治升麻鳖甲湯主之

陽之亢盛者鬱而爲陽毒皆由傷寒之後或汗吐
下亡其津液逼其熱毒上壅致面赤斑斑如錦文
熱之所過血爲凝滯致咽痛而唾膿血

升麻驚甲湯方

升麻 二兩 當歸 一兩 蜀椒 炒去汗一兩

甘草 二兩 驚甲 手指大雄黃 半兩研

右六味以水四升煮取一升頓服之老少再服
取汗。

升麻當歸辛溫以散表邪。驚甲甘草甘鹹以和陰
血。蜀椒雄黃辛甘以解咽毒。

方內有蜀椒雄黃難見今以
羅漢常葛根龍腦湯附後

葛根龍膽湯方 治熱毒面赤陽毒風溫

葛根 四兩

生薑

升麻

大青

龍膽

桂枝

甘草

麻黃

芍藥 各半兩

萎蕤 一兩

石膏 一兩半

右咬咀。水四升半。下麻黃煮數沸。去上沫。內諸藥煎二升。去滓。溫飲一升。日三夜二。

陰毒之爲病。面目青。身痛如被杖。咽喉痛。五日可治。

七日不可治升麻鱉甲湯去雄黃蜀椒主之

龐氏不去椒黃

陰之殺厲者結而爲陰毒面色青青爲寒寒毒凝於肌膚血氣不流榮衛不通故身痛如被杖寒邪客於咽則咽痛如少陰之咽痛故不吐膿血與陽毒爲異耳陰陽二毒五日毒在表可治七日毒傳裏不可治也 寒毒藏於肌膚非汗不足以通行榮衛故用升麻甘草之辛甘以和陽鱉甲當歸之辛鹹以和陰蜀椒雄黃以除殺厲之陰毒不去之

爲是也。

龐安常曰陰毒之爲病因汗下藥性冷所變多在
四五日也。或素來陽氣虛冷始得病便成陰毒。或
因傷風寒傷冷物便成陰毒。其病六日內可治。過
七日不可治。宜用附子飲。方附後

附子飲方 治陰毒脉沉微欲絕四肢逆冷大
躁而渴不止。

附子 一枚炮去皮尖四破

右以水九升煎至三升去附子盛瓶內沉井中
極冷取飲之仍灸丹田一二百壯

不効再服返
陰丹硫黃丸

論曰瘧濕暍三證同條以其同出於太陽之變百
合狐惑陰陽毒三證同條以其病同涉於怪異肺
痿與肺癰同條由其均出於肺嘔吐與下利同條
由其均起於胃腹滿與寒疝同條由其均起於寒
非比瘧證疸證無所因襲之自爲一類也先賢垂
則欲人知本而施治法惟契玄妙者方可語此

痺病脉證并治第四

師曰。痺脉自弦。弦數者多熱。弦遲者多寒。弦小緊者。下之差。弦遲者可溫之。弦緊者可發汗鍼灸也。浮大者可吐之。弦數者風發也。以飲食消息止之。

痺。殘虐也。內經曰。痲痺皆生於風。其畜作有時者何也。岐伯曰。痺之始發也。先起於毫毛。伸欠乃作。寒慄鼓頷。腰脊俱痛。寒去則內外皆熱。渴欲飲水。方其寒。湯火不能溫。及其熱。冰水不能寒。此陰陽

交爭。虛實并作。邪舍於榮衛之間。風寒之氣不常。故休作有時。而作往來寒熱也。脉自弦者。以咳喘皆生於風。風氣通於肝。故脉弦也。數爲熱。遲爲寒。小緊則邪着於裏。故可下之。遲爲寒。留於中。故可溫之也。弦爲風。緊爲寒。風寒相搏。非發汗鍼灸。無以散其邪。浮爲病在上。大爲寒。在上焦者。非吐不足以奪其病。水瀦則發熱。熱則脉數。此邪氣微者。故以飲食消息止之。經曰。五藏病各有得者愈。五

藏病各有所惡。各隨其不喜者爲病。遂其喜惡而消息之。則瘡自止。有說如此。後并無汗吐下溫鍼灸之法。去古既遠。文多簡畧。不可攷矣。至於汗吐下之外。又有移精變氣。祝由之法。按蹻導引。厭禳。避忌之宜。自古方經不能盡其要妙也。

病瘡以月一日發。當以十五日愈。設不差。當月盡解。如其不差。當云何。師曰。此結爲癰疽。名曰瘡母。急治之。宜鱉甲煎丸。

五日爲一候。三候爲一氣。一氣十五日也。夫人受氣於天氣節更移。榮衛亦因之以易。故交一節氣當愈。不愈者。再易二氣。故云月盡解也。如月盡亦不差。則邪去榮衛而着藏府。結爲癥瘕。瘕瘕母在藏府。則日以益深。宜急治之。與鱉甲煎丸。

鱉甲煎丸方

鱉甲 一十分
炙 烏扇 三分 燒
黃芩 三分

柴胡 六分
鼠婦 三分 熬
乾薑 三分

大黃 三分

芍藥 五分

桂枝 三分

葶藶 一分熬

石韋 三分去毛

厚朴 三分

牡丹 五分去心

瞿麥 二分

紫葳 三分

半夏 一分

人參 一分

麝蟲 五分熬

阿膠 三分炙

蜂窠 四分炙

赤消 十二分

蜣螂 六分熬
桃仁 二分

右二十三味爲末。取鍛竈下灰一斗。清酒一斛。五斗。浸灰。候酒盡一半。着蠶甲於中。煮令泛爛。

如膠漆絞取汁。內諸藥煎爲丸。如梧子大。空心服七丸。日三服。

癰母者。邪氣內搏於藏府。血氣羈留而不行。息而成積。故內結癥瘕。而外作往來寒熱。內經曰。堅者削之。結者行之。以鱉甲主癥瘕寒熱。故以爲君。邪結於血分者。用大黃。芍藥。蟪蟲。桃仁。赤消。牡丹。鼠婦。紫葳。攻逐血結爲臣。邪結於氣分者。厚朴。半夏。石葦。葶藶。瞿麥。烏扇。蜂房。蜣螂。下氣利小便以爲

佐調寒熱和陰陽。則有黃芩乾薑通榮衛。則有桂枝柴胡和氣血。則有阿膠人參六味。又用之以爲使也。結得溫卽行。竈灰之溫。清酒之熱。所以制驚甲同諸藥而逐癥瘕瘧母。內經曰。治有緩急。方有大小。此急治之大方也。

師曰。陰氣孤絕。陽氣獨發。則熱而少氣煩冤。手足熱而欲嘔。名曰痺瘧。若但熱不寒者。邪氣內藏於心。外舍分肉之間。令人消鑠肌肉。

痺熱也。內經曰：痺瘧者，肺素有熱，氣盛於身，厥逆上冲，中氣實而不外泄，因有所用力，腠理開，風寒客於皮膚之內，分肉之間而發。發則陽氣盛，陽氣盛而不衰，則病矣。其氣不及於陰，故但熱而不寒。此肺素有熱而成痺瘧也。今所云陰氣孤絕者，以熱邪亢盛，熱盛則氣消，故煩冤少氣，表裏俱病，令手足熱而欲嘔，心陽越也。心惡熱，邪氣內藏於心，外舍於分肉之間，內外燔灼，故令人消燄肌肉。此

熱藏於心。而爲痺瘧也。然則痺瘧之所舍。屬心肺兩經者歟。

溫瘧者。其脉如平。身無寒。但熱。骨節疼痛。煩。嘔。白虎加桂枝湯主之。

內經曰。溫瘧得之冬中於風寒。氣藏於骨髓之中。至春則陽氣大發。邪氣不能自出。因遇大暑。腦髓爍。肌肉消。腠理發泄。或有所用力。邪氣與汗皆出。此病藏之腎。其氣先從內出之外也。如是者。陰虛。

而陽盛陽盛則熱矣。衰則氣復反入。入則陽虛。陽虛則寒矣。故先熱而後寒者。名曰溫瘧。今但熱不寒。則與瘧瘧無異。意者內經以先熱後寒爲溫瘧。仲景以但熱不寒爲溫瘧也。脉如平。非平也。其氣不及於陰。故但熱無寒。邪氣內藏於心。故時嘔。外舍於肌肉。故骨節疼煩。今陽邪偏勝。但熱無寒。加桂枝於白虎湯中。引白虎辛寒而出入榮衛。制其陽邪之亢害。湯義詳喝證。

瘡多寒者名曰牝瘡。蜀漆散主之。

蜀漆散方

蜀漆

洗去腥

雲母

燒二日夜

龍骨

等分

右三味杵爲散。未發時以漿水服半錢。溫瘧加蜀漆半分。臨發時服一錢匕。

蜀漆常山苗也。得漿水能吐瘧之頑痰。雲母龍骨取雲龍屬陽之義。入足三陰經可以驅殘虐之陰。入手少陰心太陰肺。可以越酷熱之陽三陰者。其

道遠故於未發之先服。令藥入陰分以祛其邪。屬心肺者。其道近。故於臨發之時服。令藥力入心肺。以祛其邪。此方乃吐瀉痰和陰陽之劑。故牝癰溫癰俱可服。溫癰者。或肺素有熱。或邪氣內藏於心。牝癰者。邪氣內藏於肝脾腎。

論曰。癰脉自茲。卽素問痃癰皆生於風。以風者善行而數變。故脉有浮大遲數緊小之殊而不離乎茲。治法亦有汗吐下鍼灸之異。而必本於風也。雖立汗吐下鍼灸之法。後并不見其方。蓋古聖作書。

但立規模設大畧終不能耳提面誦使得諄諄詳
告尤恐以辭害意不可盡憑而未云以飲食消息
止之則活處又在汗吐下鍼灸之外也書可盡言
耶夫瘧多發於夏秋而禮記曰寒熱不節民多瘧
疾此四時偏寒偏熱之氣人感之則四時有勝復
陰陽交爭之疾也四時瘧者內經曰以秋病者寒
甚新涼收斂寒不外泄陰陽相激故令寒甚周禮
云秋瘧寒疾疏云秋陽漸消陰方盛惟火沴金兼

寒兼熱故有瘧寒之疾也。以冬病者寒不甚陽氣閉藏雖寒熱交爭而伏陽在內足以勝之故寒不甚也。以春病者惡風春時陽氣開發腠理漸疎餘寒留連於榮衛之間則起毫毛而令洒淅惡風也。以夏病者多汗暑熱流行肌膚蒸溽值邪居之則汗多泄也。然邪氣殘虐衛氣慄悍故內經曰與衛氣應乃作以殘虐之邪而值慄悍之氣邪正交爭故其寒湯火不能溫其熱冰水不能寒也。其發之

早寢者以邪氣留於陽則發早。留於陰則發寢。其
有今日子發而明日丑發。漸次而轉於戌亥。又復
發於子丑者。蓋榮衛之行不休。挈其邪氣行於陽。
則發於午前。挈其邪氣行於陰。則發於午後。故內
經以風無常府故也。夫邪氣入風府。循脛而下。下
者入陰分也。故其發也。晏。其氣上行。出於缺盆。上
者。陽之分也。故其發也。早。其間日作者。邪不居榮
衛。不在藏府。在於藏府榮衛之間。募原之處。邪氣

蓄積則內薄藏府而外薄榮衛故間日或二三日發也。靈樞經曰：瘧者內薄於五藏，橫連募原，其道遠，其氣深，其行遲，不能日作，故次日乃蓄積而作也。詳蓄積二字，則非一日之義明矣。必候蓄積與衛氣相當，則病作也。此日之遠近，發之蚤晏者，如此。若前輩以子午卯酉日發爲少陰瘧，寅申巳亥日發爲厥陰瘧，辰戌丑未日發爲太陰瘧，似無據之論。其溫瘧則熱伏藏於心肺之間，身無寒而但

熱故內經曰火鬱之發民病溫瘧。此瘧者或發于
秋深。內經以秋病者寒盛。或寒水勝火。內經以陽
明司天。四之氣病瘧寒之疾。此在泉君火。客氣寒
水勝之。水火交爭而作寒瘧。內必有頑痰痼冷。伏
於至陰之分也。其先寒而後熱。先熱而後寒。熱多
而寒少。寒多而熱少者。內經以先傷於寒而後傷
於風。故先寒而後熱。先傷於風而後傷於寒。故先
熱而後寒。夫風寒之入於身。不卽病者。必鬱而爲

熱故先熱而後寒。或熱多而寒少。其卽病者不分風與寒。必先起毫毛而發寒慄。令寒多而熱少。未可執泥經言。經則言其常。此則言其變也。此外復有痰癰。食癰。水飲。積血之屬。亦不過癰之兼證。而痰飲。積血。積食。必不能起毫毛而發腠理。作寒慄。而鼓頷。其必本於風寒也。則又奚疑。治之之法。察六淫之淺深。辨五藏之邪賊。內經分十二經以刺之。亦可分十二經以藥之也。

中風歷節病脉證并治第五

夫風之爲病。當半身不遂。或但臂不遂者。此爲痺。脉微而數。中風使然。

內經曰。風者善行而數變。或着於半身。或着於一臂。風邪居之。則身臂不遂。而榮衛失其隧道之常度。故血凝於膚者爲痺也。脉微則正氣虛。數則邪氣勝。以邪之所湊。其氣必虛。故中風令脉如此。寸口脉浮而緊。緊則爲寒。浮則爲虛。寒虛相搏。邪在

皮膚浮者血虛絡脉空虛賊邪不瀉。或左或右邪氣反緩。正氣卽急。正氣引邪。喎僻不遂。邪在於絡肌膚不仁。邪在於經卽重不勝。邪入於府卽不識人。邪入於藏舌卽難言。口吐涎。

邪在皮膚則脉緊。脉絡空虛則脉浮。脉絡空虛則邪易中。若不瀉之。其邪或在於左。或在於右。邪盛而正虛。逼其正氣。是以正氣卽急。而邪氣反緩。正氣行於經隧之間。引邪氣於頭面。則爲喎僻。引邪

氣於四肢則爲不遂也。邪之淺者在經絡。邪之深者入藏府。孫絡之散見膚腠。邪氣凝而不行。故其肉不仁。大經之行於經隧。邪氣留而不去。故體重不勝。不識人者。經所謂朦昧暴瘖。此邪入府。則朦昧不識人。入藏則舌難言而爲瘖矣。舌難言則唇吻不收而涎下也。

寸口脉遲而緩遲則爲寒。緩則爲虛。榮緩則爲亡血。衛緩則爲中風。邪氣中經則身痒而癢疹。心氣不足。

邪氣入中。則胸滿而短氣。

難經曰。血主濡之。血亡則榮衛不濡。而邪易中。故令寸口之脈遲而緩。遲爲寒。入於經。緩爲血不足也。氣客於經絡之中。令身痒而癢。瘳者。以邪氣搏於皮膚。其氣外發。腠理開。毫毛搖。氣往來行。則爲痒。痒爲泄風。而癢。瘳成也。若心氣不足。則邪乘不足而客於心。客於心。則隔礙其息道。故胸滿而短氣也。

寸口脉沉而弱。沉卽主骨。弱卽主筋。沉卽爲腎。弱卽爲肝。汗出入水中。如水傷心。歷節黃汗出。故曰歷節。聖濟總錄曰。歷節風者。由血氣衰弱。爲風寒所侵。血氣凝澁。不得流通。關節諸筋無以滋養。真邪相搏。所歷之節。悉皆疼痛。或晝靜夜發。痛徹骨髓。謂之歷節風也。節之交三百六十五。十二筋皆結於骨節之間。筋骨爲肝腎所主。今肝腎并虛。則脉沉弱。風邪乘虛滲於骨節之間。致腠理疎而汗易出。

汗者心之液。汗出而入水浴。則水氣傷心。又從流於關節交會之處。風與濕相搏。故令歷節黃汗而疼痛也。

跌陽脉浮而滑。滑則穀氣實。浮則汗自出。

跌陽胃脉也。胗在衝陽。滑則爲實。浮則爲風。風則令汗出。亦歷節之脉。

少陰脉浮而芤。芤則血不足。浮則爲風。風血相搏。卽疼痛如掣。

少陰腎脉也。胛在太谿。若脉浮而弱。弱則血虛。虛則邪從之。故令浮弱。風血相搏。則邪正交爭於筋骨之間。則疼痛如掣。

盛人脉濇。小短氣。自汗出。歷節疼。不可屈伸。此皆飲酒汗出當風所致。

盛人不應脉濇。小濇爲血虛。小爲氣弱。內經曰。脉小弱以濇。謂之久病。短氣者。正氣內虛。汗出者。邪氣外勝。故歷節痛。不可屈伸也。飲酒中風。則爲漏。

風。今爲歷節何也。以風邪常留於肌表。則爲漏風。今盛人脉濇小。榮衛俱虛。風邪乘其汗出。而入搏於筋骨之間。則爲歷節。此風之所以善行而數變也。

諸肢節疼痛。身體尪羸。脚腫如脫。頭眩短氣。溫溫欲吐。桂枝芍藥知母湯主之。

諸肢節痛。謂骨節盡疼痛。痛久則邪盛正弱。身體卽尪羸也。歷節之病。由於汗出入水。酒後當風。風

濕下注而爲脚腫。搏於谿谷而筋絡絕傷。故脚腫如脫也。頭眩短氣者。正氣虛也。溫溫欲吐者。寒邪勝也。與桂枝芍藥知母湯。溫經而散寒濕。

桂枝芍藥知母湯方

桂枝

四兩

芍藥

三兩

甘草

二兩

麻黃

二兩

生薑

五兩

白朮

五兩

知母

四兩

防風

四兩

附子

二兩

炮

右九味。以水七升。煮取二升。溫服七合。日三服。

內經曰。形氣不足。病氣有餘。是邪勝也。又曰。外淫於內。所勝治之。桂枝麻黃防風甘草。辛甘以散風邪也。濕淫所勝。平以苦熱。佐以辛酸。以苦燥之。附子知母之苦熱。芍藥生薑之辛酸。白朮之苦燥。脾爲治肢節疼痛之大劑。又曰。桂枝麻黃生薑防風。長於去風發表。故用芍藥之酸寒。以收之。附子大熱有毒。過於溫經散濕。故用知母之苦寒。以制之。甘先入脾。白朮甘草之甘。引諸風藥以入脾。勝濕。

味酸則傷筋。筋傷則緩。名曰泄。鹹則傷骨。骨傷則痿。名曰枯。枯泄相搏。名曰斷泄。榮氣不通。衛不獨行。榮衛俱微。三焦無所御。四屬斷絕。身體羸瘦。獨足腫大。黃汗出。脛冷。假令發熱。便爲歷節也。病歷節不可屈伸。疼痛。烏頭湯主之。

內經曰。酸傷筋。鹹傷骨。故味過於酸。肝氣以津。津則筋緩。緩則肝氣泄。味過於鹹。大骨氣勞。勞則骨痿。痿則腎藏枯。枯而又泄。肝腎并傷。名曰斷泄也。

榮行脉中。衛行脉外。榮氣不通。則衛氣亦因之不行。不行則榮衛虛微。而真元之氣不能通會於三焦。三焦則無所統御。四肢亦斷絕也。既已榮衛虛微。肝腎并傷。則脾胃亦從而病。以脾主身之肌肉。故身體羸瘦。胃脉在足。故足獨腫大也。脾胃虛則風濕外襲。薄於皮膚。則爲黃汗。注於下焦。則爲脛冷。流於關節。則發熱。歷節痛也。歷節則使人屈伸不利。而疼痛。與烏頭湯強筋骨而去風濕。

烏頭湯方

麻黃

芍藥

黃耆

各三兩

甘草

炙

川烏

五枚咬咀以蜜二升煎取一升卽出烏頭

右五味咬咀四味以水三升煮取一升去滓內蜜煎中更煎之服七合不知盡服之

歷節疼痛者散以麻黃川烏之辛屈伸不利者緩以甘草之甘芍藥以通榮黃耆以行衛佐諸風藥而通行榮衛則歷節風濕之邪自不能容矣仲景

每用烏頭而以蜜煎者制其熱毒也。

舊本有侯氏黑散風引湯防已地黃湯頭風摩膏
礬石湯所主皆非中風歷節證是宋較正附入唐
人方也凡仲景方經證在前而方在後未有方在
前而證在後者况仲景爲醫方之祖復取侯氏方
以爲法耶讀仲景書
者知之今概不錄

血痺虛勞病脉證并治第六

問曰血痺從何得之師曰夫尊榮人骨肉肌膚盛重
因疲勞汗出卧不時動搖加被微風遂得之但以脉
自微濇在寸口關上小緊宜鍼引陽氣令脉和緊去

則愈。

內經曰。血凝於膚者爲痺。尊榮人謂膏粱之人也。膏粱數食甘肥。故肌膚盛而骨弱。肌膚盛則不任疲勞。是以疲勞則汗出。汗出則腠理時開。卽加被微風。亦遂得血痺也。血旣爲風寒所凝。則脉自澹而寸關自緊。鍼能導經絡。取諸痺。故宜鍼引陽氣以瀉風邪。令脉不澹而和。緊去則邪從散而病愈。問曰。痺之爲病。害人最廣。今人罕知經有五藏五

痺復有風寒濕三痺。仲景俱畧而不言。而獨稱血痺。其復加血之一字。何也。無所經見。意者別有血耶。曰。在經有也。經曰。榮者。水穀之精氣。和調於五藏。酒陳於六府。乃能入於脉也。故循脉上下。貫五藏。絡六府也。又曰。衛氣者。不與風寒濕氣合。故不爲痺。經言榮者血也。衛者氣也。仲景復加血之一字。言血能爲痺。而氣不爲痺。欲人專從血以理痺。其意在使人易識也。又問曰。血痺與虛勞本非

一證而與同條共出。復將痺俠背行馬刀俠癭者。皆痺證也。而置在虛勞證中。何也。曰大率痺氣多從虛勞得之。而人至中年已後。虛勞者率多成痺。其不爲甚辨者。由其病之相須。欲人知所本也。痺俠背行馬刀俠癭者。痺也。置之虛勞者。言虛勞之能爲痺也。以此而言。見其可以共條。非輕意爲之者也。故總具以見病。錯陳以見情。欲學者潛心玩索而自得之。原本之論也。獨不察其方乎。黃芪五

物卽小建中之藥也

血痺陰陽俱微寸口關上微尺中小緊外證身體不仁如風痺狀黃耆桂枝五物湯主之

陰陽俱微寸關上微則三部脉俱微也尺中小緊者承上章而言以血痺之病不惟寸關小緊而尺中亦小緊也不仁者不知痛痒也內經曰衛氣有所凝而不行故爲不仁今風寒客於肌膚凝其血脉故外證身體不仁如風痺狀用黃耆桂枝五物

湯以通行榮衛而治血痺。

黃耆桂枝五物湯方

黃耆 三兩

芍藥 三兩

桂枝 三兩

生薑 六兩

大棗 十二枚 一方有人參

右五味。以水六升。煮取二升。溫服七合。日三服。
血痺不仁。則榮衛不利。黃耆走衛。芍藥走榮。得桂
枝宣導。則能出入陰陽。而調榮衛。辛以散風邪。甘
以緩肌肉。薑棗辛甘。佐諸藥以逐風邪。而和肌肉。

論曰仲景桂枝湯治傷寒中風以爲只治傷寒中風而已。及觀夫陽明太陰少陰厥陰諸證率用桂枝而要略又以該治虛勞諸證則未嘗少缺不獨只以治傷寒中風也。余嘗因是而得仲景之心法矣。乃本草所謂溫中利氣通血脈宣導百藥者也。惟其性熱大辛故能通利諸氣無所畏避。血脈和順則邪無所藏。自然榮衛強盛。疾病不作矣。經曰辛以散之辛以潤之是也。夫諸病之作皆氣逆而

壅塞不通。今能散其逆氣。而使血脉融和。雖有經絡風邪。無由而藏蓄矣。故知仲景用之以通行血脉。而諸邪自去。又與諸攻擊者不同。是何病之不可用也。由是而觀。則知素問治鼓脹以鷄矢醴。治脾痺以蘭草。治怒狂者以生鐵落。治目不瞑者以半夏。用之如響應桴。考之本草。并無是能然。則皆因其所利而導之。未嘗任藥性以攻擊之也。夫意不盡言。言不盡意者。藥性也。猶將軍之操刃而不

殺人者。以決勝在乎謀也。得藥性而不敢遽用者。
以傳化由藏府也。故兵家有言曰。兵無常勢。水無
常形。制敵之妙。在乎人心。此意又在方法之外也。
夫男子平人。脉大爲勞。極虛亦爲勞。

大脉爲虛陽有餘。而真陰不足。并極虛人皆爲勞
也。

男子面色薄者。主渴及亡血。卒喘悸。脉浮者。裏虛也。
內經曰。心者。生之本。神之變也。其華在面。其充在

血脉津枯血耗之人。色澤不能華其面。故面色薄也。喘爲氣虛。悸爲血弱。其脉又浮。此榮衛俱傷。爲裏虛證也。

男子脉虛沉弦。無寒熱。短氣裏急。小便不利。面色白。時目瞑兼衄。少腹滿。此爲勞使之然。

沉弦爲陰。病屬裏虛。故無寒熱。便溺者。氣化乃能出。肺虛則氣短。氣短則不能通調水道。故裏急。小便不利。而少腹滿也。白爲肺色。鼻爲肺竅。氣旣不

能下化則上逆於頭故目爲之瞑迫於血而鼻爲之衄也。內經曰勞則氣耗其是類歟。

勞之爲病其脉浮大手足煩春夏劇秋冬差陰寒精自出酸削不能行。

浮大俱爲虛脉故勞之爲病脉浮大也。四肢者諸陽之本陰不勝其陽則手足煩春木旺夏火旺陰虛陽盛之人當木火燔灼之日故春夏劇秋金旺冬水旺金水相生之月正陰平陽秘之時故秋冬

差。寒字作虛字看。陰虛則真氣不守。而精自出。精出則酸削而不能行。

男子脉浮弱而濇。爲無子。精氣清冷。

男子精氣濫瀉。陰陽和。故能有子。今脉浮弱。則陽不和矣。脉濇。則陰不和矣。濇者。參伍不調。爲血少。傷精之脉。必精清氣冷。而令無子。

夫失精家。少腹弦急。陰頭寒。目眩髮落。脉極虛芤遲。爲清穀亡血失精。

腎主閉藏。肝主疎泄。失精則過於疎泄。故少腹弦急也。陰頭爲宗筋之所聚。真陽日虧。故陰頭寒也。目眩則血衰。髮落則精竭。是以脉極虛。芤遲而虛主失精。芤主亡血。遲主下利清穀也。

脉得諸芤動微緊。男子失精。女子夢交。桂枝龍骨牡蠣湯主之。

脉芤而厥厥動搖轉索無常。故曰芤動微緊。此皆虛脉。男子得之則失精。女子夢交亦失精也。

桂枝加龍骨牡蠣湯方

桂枝

芍藥

生薑

各三兩

甘草

二兩

大棗

十二枚

龍骨

牡蠣

各三兩

右七味以水七升煮取三升分溫三服

桂枝生薑之辛以潤之。龍骨牡蠣之澁以固之。甘草大棗之甘以補之。芍藥之酸以收之。則夢交失精可愈。

男子平人脉虛而細微者善盜汗也。

細微虛弱則陽氣陷入陰中而不能衛外故善盜汗。

人年五六十其脉浮大者痺俠背行若腸鳴馬刀俠瘦者皆爲勞得之。

人年五六十則氣血已虛。虛則脉大。大則風邪居之。故痺循背而行。若脉大而腸鳴則中氣虛。虛則經絡不行。肝木不能遂其條達之性。鬱而爲馬刀。

俠癭者皆從勞而得

脉沉小遲。名脫氣。其人疾行則喘喝。手足逆寒。腹滿。甚則澹泄。食不消化也。

脉沉小遲。則陽氣已虛。故名脫氣。氣脫而疾行之。必令人喘喝也。氣不能以通行四末。故手足逆寒。不能以消磨水穀。故腹中滿。是以甚則有澹泄。食不消化之證。

脉弦而大。弦則爲減。大則爲芤。減則爲寒。芤則爲虛。

虛寒相搏。此名爲革。婦人則半產漏下。男子則亡血失精。

人之所以有身者。精與血也。內填骨髓。外溉肌膚。充溢於百骸。流行於藏府。乃天一所生之本。四大藉此以成形。是先天之神氣。必恃後天之精血。以爲運用。有無相成。陰陽相生。毋令戕害。若其人房室過傷。勞倦過度。七情暗損。六淫互侵。後天之真陰已虧。先天之神氣并竭。在婦人則半產胞胎。或

漏下赤白。在男子則吐衄亡血。或夢交泄精。膠其
脉必弦而大。弦爲寒而大爲虛。旣寒且虛。則脉成
革矣。革者如按鼓皮。中空之象。卽芤大之脉。內經
曰。渾渾革革。至如湧泉。病進而危。樊故仲景一集中
前後三致意焉。

虛勞。裏急。悸。衄。腹中痛。夢失精。四肢痠疼。手足煩熱。
咽乾口燥。小建中湯主之。

裏急。腹中痛。四肢痠疼。手足煩熱。脾虛也。悸。心虛

也。衄肝虛也。失精腎虛也。咽乾口燥肺虛也。此五藏皆虛而土爲萬物之母故先建其脾土。

問曰。仲景虛勞證中。已治悸衄而後復有悸衄。瘀血一條必非一病。兩出。豈前之所言者爲虛勞。而後之所言者爲陰虛火動證耶。曰。虛勞者固能令人亡血。然偏熱偏寒。瘀於內者。亦令人亡血。虛勞而亡血者。但當治其虛勞。則自無吐衄之患。故用薑棗飴桂黃耆之屬。大甘藥以補其元陽。陽氣充

足則血自止。若偏寒偏熱。滲於內者。亦令泛溢於上。滲泄於下。不由隧道。錯經妄行。治有溫之寒之。下之之異。若一槩施治。寧無差謬之弊乎。如虛勞而治以後方。則戕其正氣。寒熱而治以前藥。則熾其賊邪。是以先後分開。而治法迥別。故虛勞而附在血痺。瘀血而附以吐衄。各因其病本所同。欲使工因病而自求其故耳。不然。何不將虛勞另作一條。而以此吐衄附之哉。至於咳嗽亦然。爲肺氣不和。

而嗽者則屬於肺痿。爲其藏同也。爲水飲而嗽者。則屬之於飲。爲其病同也。亦兩出而治不同法。由其致病本殊故也。人求其病而不得。盍不求其法而察之。所謂陰虛火動者。古無是說。乃後人之妄意。古人所患者。唯在陽虛而陰盛耳。虛則必寒。故治以溫補。曷嘗有寒補以治虛火者。其見之何經乎。何知藥之屬日用而不知戒也。

小建中湯方

桂枝三兩去皮甘草三兩炙大棗十二枚

芍藥六兩生薑三兩膠飴一升

右六味以水七升煮取三升去滓內膠飴更上微火消解溫服一升日三服嘔家不可用建中湯以甜故也。

內經曰脾爲中央土以灌四旁故能生萬物而法天地失其職則不能爲胃行其津液五藏失所養亦從而病也建中者必以甘甘草大棗膠飴之甘。

所以建中而緩諸急。通行衛氣者必以辛。薑桂之辛。用以走表而通衛。收斂榮血者必以酸。芍藥之酸。用以走裏而收營。營衛流行。則五藏不失權衡。而中氣斯建矣。

虛勞裏急諸不足。黃耆建中湯主之。

黃耆建中湯方

於小建中湯內。加黃耆一兩半。餘依上法。

氣短胸滿者。加生薑。腹滿者。去棗加茯苓一兩。

半。及療肺虛損不足。補氣加半夏三兩。

虛勞。則中氣不足而裏急。甘能緩諸急。故加黃耆之甘。同膠飴甘輩以緩急而補不足。從所不勝來者爲賊邪。故用芍藥之酸以防肝。從所勝來者爲微邪。故用桂枝之辛以泄腎。生薑泄逆氣。故短

氣胸滿者加生薑。甘令中滿。故去大棗。淡能滲泄。

故加茯苓。茯苓能止欬逆。故療肺虛不足。補加半夏未詳

虛勞腰痛。少腹拘急。小便不利者。八味腎氣丸主之。

腰者腎之外候。腎虛則腰痛。腎與膀胱爲表裏。不得三焦之陽氣以決瀆。則小便不利。而少腹拘急。州都之官。亦失其氣化之職。此水中真陽已虧。腎間動氣已損。與是方以益腎間之氣。氣強則便溺行。而小腹拘急亦愈矣。方議詳婦人雜病

虛勞諸不足。風氣百疾。薯蕷丸主之。

薯蕷丸方 二錢五分爲一

薯蕷 二十分 當歸

桂枝

故肌膚甲錯。不能以營於目。則兩目黯黑。與大黃
蟬蟲丸以下乾血。乾血去。則邪除。正王。是以謂
緩中補虛。非大黃蟬蟲丸能緩中補虛也。

大黃蟬蟲丸方

大黃 十分蒸
黃芩 二兩

甘草 三兩

桃仁 一升
杏仁 一升

芍藥 四兩

乾地黄 十兩
乾漆 一兩

蟬蟲 一升

水蛭 百枚
蟻螬 一升

麤蟲 半升

右十二味。未之煉。蜜和丸。小豆大。酒飲服五丸。
日三服。

內經曰。堅者削之。是方純削堅之劑。雖有甘草。安
能解其剋伐之性。而緩其藥勢者哉。婦人虛勞。大
半內有乾血。男子亦間有之。審其可攻而攻之。則
厥疾可愈。難經曰。損其肝者。緩其中。其此意歟。